

四庫全書

集部

欽定四庫全書

震澤集卷七

明 王鏊 撰

詩

追思慈愛堂為武定侯郭勛賦

蒼梧雲黯燕雲濕北堂燕山空掩泣江湖漠漠山重重
高堂人遠何嗟及憶昔前人佐真主金戈百戰開茆土
山河帶礪誓始終奸蠹潛萌中齟齬牀前學語藐諸孤
抱向閭闔聞呱呱天門九重不可問十年泣血紛連如

飲冰嚙蘗老益堅中宵抱恨常悄悄金石可移心不改
茹苦銜哀重籲天精誠動天天為顧節土還加舊名數
金書鐵券古元勲橐鞬戟纛新開府聖恩重處慈恩深
玉帶腰懸自循撫古云死易立孤難程嬰杵臼猶推殘
誰知女婦伸大義坐令荀息生厚顏昊天有極恩罔極
迴望燕雲長太息

四月九日與弟秉之進之過通安橋顧氏因偕
立敬登陽山絕頂次日過虎山橋七寶泉至

靈巖山而還得詩三首

陽山高哉幾千丈，箭缺遙瞻在天上。
一朝置我箭缺傍，坐覺諸山皆退讓。
太湖汀瀝平於杯，夫椒包山近相並。
山腰鳥道何盤盤，十步九折行且歎。
昌黎正逢衡嶽霽，太白休歌蜀道難。
夫差悔悟苦不早，公孫白骨纏荒草。
子胥伯嚭兩丘墟，天地茫茫人易老。
剗然長嘯來悲風，一杯敬酌浮丘公。
何時借我綠玉杖，從此拄過扶桑東。
詩成西日下山去，回視山椒但煙霧。

虎山橋

湖上仙山翠巘重
畫闌面面對芙蓉
人家斜日東西崦
野寺浮嵐遠近鐘
我欲濯纓來此處
誰能築室傍前峯
放舟又過溪橋去
恐有桃源惜未逢

七寶泉

嵌巖滴玲瓏
七寶甃完月
幽亭泉上頭
暗道曲通穴
剖竹走長蛇
晝夜鳴滴滴
煎無三昧手
渴有七盃寒
能醒心神澄
可鑑毛髮
桑苧行不到
品第誰為別
埋沒向

空山惻此行道喝

和林都憲見素侍用見寄之韻三首

止足平生不願餘肯將道義負心初
詩傳元白郵應困門引鄒枚席尚虛
甲第又承三世學皂囊曾草萬言書
交游海內知多少尺牘何人問隱居

俯仰乾坤思有餘民風漸降已非初
東都氣節真堪重西晉風流好是虛
慷慨有懷公攬轡殘生無用我耽書
七閩風月誰收管多在雲莊一晦居

夔蛟誰欠復誰餘門掩青山過雨初獨樹春歸花意開
九天雲盡月輪虛懷人不見願空拄得句無言手自書
寂寂荒村斷來屨洞天眞作野人居

八月四日送子延詰北上八日至鎮江游甘露
寺看狼石泛舟登焦山至絕頂順風揚帆直
抵金山壯哉游乎得詩四首

甘露寺

頗憶登臨勝拏舟復此過羸劉傷斷壠

北固山後始皇
謂有王氣鑿斷

之至今殘岡斷壠庭有二鐵
鎖甚巨刻云梁天監中鑄

梁刻認餘波海霧晴噓屋

江風夜吼鼉孫劉何處問狼石臥荒坡

焦山

還將雙髻白來看一峰青江海交流處乾坤著此亭山
形雄虎勢雨氣挾龍腥尚記燒丹井難尋瘞鶴銘

金山

快得天風便輕帆破浪花江山曾有約人世亦無涯岬
壓潛鼉窟潮侵落鴈沙未須留玉帶且欲訪靈槎

鶴林寺

鶴林自是前朝寺落日荒郊有一僧
安得道人殷七七
杜鵑花似舊時能

懷泉

泉之流兮湯湯我之懷矣與泉偕逝而無忘泉之鳴兮
泠泠我之懷矣與泉偕滴而無聲山下出泉兮于彼幽
谷我種我橘兮于山之麓泉橘相依兮其陰日繁以沃
橘之香兮泉之列病者飲之兮浣彼肝肺泉之甘兮橘

之香病者飲之兮盪彼胃腸痠痛消亡兮神明內融濟
人利物兮前人之功吾雖不及前之人兮心與前人之
心同我願橘香兮不絕泉兮不竭我心亦然前與茲泉
終古而不歇

野航

野航誰謂小恰受野人身載我欲何向五湖煙水濱

庭前牡丹盛開

一年花事垂垂盡忽見庭前錦繡層粉臉薄侵紅玉暈

芳心斜倒紫檀枝春雲不動陰常覆曉露微霑媚轉增
造化無私還有意石闌干畔幾迴凭

送蕭九成

聞道為關日舟船正好行依然經賦足頗覺筭緡輕牢
落江湖夢遲迴故舊情致身霄漢上林下望昇平

八仙獻壽圖

今日何日春晝長祥雲五色如蓋幢玄元儼在雲中央
羣仙雜遝進壽觴鳳麟為脯瓊為漿彈八琅璈舞霓裳

玄元既醉悅且康授以長生不老之藥方我公之壽三千霜

飛仙圖

若有人兮來自天雲為冠帔星為鈿九霞袂帶霓輜軒
幡幢繚繞笙簫闌雙成擁後飛瓊前綽約似是瑤池仙
玉山之南半山主主人已去有賢姥冰霜之操節獨苦
精誠動天天應許有桃如斗棗如瓜紛天仙兮以媵女
九還七返仙家丹坐令白髮回來顏賢姥之壽齊南山

得孫喜而有作

七十年來孫始見啼聲一聽便開眉
家藏萬卷真堪托庭植三槐夙所期
膝上久拚文若坐目前先慰右軍思
三朝袍笏吾無用付汝他年佐盛時

廣成子壽圖

青山重重白石齒齒長松陰陰濯濯
清泚中有至人綠髮方瞳似廣成子
降于崆峒羣仙何來蓬萊之島酌彼
瓊漿後天難老願分餘瀝及此下民
吳門之隱僖敏之

孫七十年間陰功在人翱翔藝苑及今白首何以祝之
岡陵山阜

韓文公勘書圖

墟落新涼對勘書士龍臨此意何如江南亦有韓熙載
到處人傳夜譙圖

贈況山人

姑蘇入國朝守也誰第一況侯江右來經緯氣鬱碑雉
頑境界清減稅惇嫠殖所以吳下人至今感至骨空山

掩關臥有士叩蓬華云是況家孫兼邃青烏術洞庭白沙間為我卜窀穸茫茫彼雲山莫此云最吉侯政自堪思生意尤款密胡能終偃蹇命車還一出我生本悠悠世事仍吐吐生前且莫料身後誰能詰青松白石間與子坐終日勿言身後事且盡杯中物

覽黃省曾明水集

勉之生也少所負良崎嶇雖從諸生游而懷物外心賦詩何所師泠泠秋磴琴鍾生去我久誰復賞此音不見

昭代士麗藻映詞林元間與大呂一鳴喙皆瘖青紫俯
首拾為國希世琛

東岡隱士築亭於松竹之間名曰款相意以為
予予不敢當而有也為易曰來賢八月二十
四日初會亭上口占一律

竹間新築小亭低草色花香醉不迷安樂窩中人略似
逍遙公後世誰齊莫因徐孺懸陳榻時許王猷過剡溪
願得時和邊燧息賦詩携酒日同躋

八月十五夜再得孫復次前韻

一歲中間孫再見馬家誰數白為眉冰輪滿正中秋夜
光嶽完當丙子期書卷家傳吾欲付麒麟抱送夢堪思
從今好學汾陽領尚見箕裘克紹時

送吳文之會試

湖上輕帆曠去颿燕雲漠漠快鴻毛洛陽賈誼年猶少
蜀郡揚雄賦最高歷塊始知千里駿當場誰是九方臯
洞庭自昔鍾靈秀不用夷亭俟海濤

次韻東岡十詠

五畝幽棲地謀生不願餘門淹戶牖轍架秩鄴侯書富
貴憑蕉鹿文章辨魯魚尚餘驕客在且欲倩君鉏

洞天連福地閉戶養吾真世降民風古春歸景象新雞
豚同作社魚鳥自相親借問誰相似羲皇以上人

蒼雪餘千挺清風幾百竿葡萄羞晚酌苜蓿媚春盤理
亂誰能係升沉已厭觀鹿門真得筭獨遺子孫安

階穿新迸笋屋破暫牽蘿欄養能言鴨池馴博字鷺處

喧長得靜取足不求多獨對青山飲時時一浩歌

誰謂市廛遠時新薦亦嘉庾郎春末韭陸叟雨前茶架
護新秧橘瓶翻自灌花山人殊未識道是魯東家

先民遺訓在種德莫如滋盧橘接成樹楊梅低壓枝壽
應能比櫟智豈不如葵沮溺耕相耦都忘抱甕疲

未能齊出處猶幸得齊年郭泰舟同載陳蕃榻借眠溪
山朝上日墟落晚生烟村徑相過近詩成幾百篇

剩得幽居趣懸車却悔遲款山低作檻畎水曲通池步

月相携處觀雲獨坐時悠然沂上樂點後少人知

黃閣歸來日伊誰共歲年巷中顏氏樂谷口子真賢小
閣調鸚語閒牕對鶴眠平生出處意把酒問青天

耕桑時有暇風物亦登臨自是逃虛子誰同擊壤吟簡
編中對古冠服外隨今一勺源頭水冷然洗我心

杏林

陸家園裏千株杏處處花開不待春種樹由來還種德
枝頭顆顆揔含仁

三月三曰庭前白牡丹一枝獨開

紅紫休誇錦作堆瑤華一朵占先開似從姑射山頭見
不減唐昌觀裏栽綽約每憐天與態瓏璵應藉雪為胎
風情一種無由見携酒誰當月下來

董諭德文玉歸省其父太守德初詩以寄之德
初余同年進士也

瓊林三百英雄輩海北天南復幾人獨喜長庚陪曉月
更誇威鳳應昌辰詞垣正印斯文遠曲水浮觴楔事新

萬木青松何足羨與君同閱八千椿

秉之齒落有詩且羨予齒之牢和其韻以慰之

且自慰云耳

兄弟一氣耳誰強誰獨衰弟齒齧更落予髮白且徒朝
來覽明鏡鬚髻亂如茨咄哉此二疾自古誰能醫太公
口含兩張蒼一無之年皆過百歲天豈云獨私人生真
大夢世事如奕棋社櫟散乃壽自全本支離兄弟幸在
告為樂當今茲湖山共追逐杖藜未須支頭童與齒豁

韓公浪云悲西山朝氣爽不妨拄空顧

姪延學作亭湖上甚壯欲予詩以落之率成

二首

幾醉池亭雪色醪近聞亭子勢尤高白鷗不避新翻曲
黃鳥時窺舊賜袍波影半簾雲滉漾山形四面畫周遭
我來壁上題詩句禿盡山中顧兔毫

風風雨雨過端陽畫扇朱絲邈建章佳節久拚連日醉
故山空負一春忙胸中漫貯匡時略肘後新傳卻老方

聞道湖州園未解坐令胥口作瞿塘

讀擊壤集效其體

林下老人何所求求非拜相非封侯所求海內民生遂
所願朝廷聖德修工絲人人崇禮讓羌夷永永罷戈矛
熙然萬載雍熙治林下老人何所求

二氣陰陽相濫摩不知真宰意云何三王二帝時節少
五季六朝喪亂多倉琅又見歌赤燕翠釜還聞羞紫駝
近事天高何處問牛女今宵方渡河

我愛東岡一老人百年長作太平民無憂無喜亦無媿
有酒有詩兼有賓接樹灌花為活計游山玩水摠天真
我生亦是悠悠者願得東西永作鄰

水仙花

藐姑射之神人携漢濱之二女儼仙袂之飄飄涉滄波
而齊步悵交甫以莫從攀桂枝兮延佇

丁丑八月二十日與弟姪輩泛太湖將遊石蛇
山舟發微雨既而雨大作抵消夏灣蔡九達

舍宿明日雨又作游興索然乘便風而還至
家則日出皎然矣為之一笑賦詩紀之

載酒張帆信所如青山含雨轉模糊
蛇丘咫尺翻成遠夏渚消搖可作踈
世事無端還自笑秋陰有像若為圖
始知白傳真堪羨五宿澄波皓月湖

庭梧七首

庭梧曾手植忽已逼蒼穹清夜長聞雨
晴朝慣惹風旌幢驚對峙琴瑟訝中空
鳳鳥何年至吾生尚爾逢

春朝起常遲欲覺還偃仰隔牕幽鳥聲日照梧桐上
暑夜卧常遲搖搖動輕簟仰嘯取天風風在梧桐葉
秋夜忽已涼風葉何蕭騷露坐不知久月挂梧桐梢
長夜夢初回月上山之厓何由知月上梧桐影橫斜
長夜夢初回雨來山之北何由知雨來梧桐聲淅瀝
冬夜不成眠寒燈聽騷屑天明驚皚皚梧桐枝上雪

和東之送菊菊有楊妃西施之號

先春罨土槿編籬同對年來亦好竒自笑老夫心力懶

黃華隨意著高枝

爛醉都忘倒接離
高堂四菊十分奇
西施未醒楊妃醉
白髮樽前恐未宜

年來黃菊也隨時
闕出金盤與玉卮
獨有歲寒心尚在
落英重作楚人詞

瑞柑詩

有序

洞庭柑橘名天下
弘治正德之交
江東頻歲大寒
其樹盡槁
民間復種
又槁
包貢則市
諸江西福建

謂柑橘自此絕矣予圃漫栽數株丁丑秋樹有五
千餘顆皆珍柑也其餘纔盈二尺許亦結五千餘
顆山人爭謂之瑞喜而賦之

洞庭千樹綠化逐鶴林仙寂寞荒園裏纍垂寶顆揚
州傷錫貢合浦詫珠還瑞應憑誰紀靈根自此傳

素履詩

考祥元視履厥初慎无咎紛華非所忻貞靖自吾守遂
止諒不能欲進夫豈苟黼黻煥彰施白賁乃其舊

東菑詩

君豈東菑人而事東菑役帶經和雨鉏抱硯臨溪滌非
菑安有畬不耕固無獲他年看秋成千鍾豈謀食

西湖

我愛西湖好何時此一行六橋明月夜花底畫船橫

丁丑十一月得宣府報

土木垂殷鑒俄傳北狩音淚纏寰宇痛坐厭法宮深洛
汭歌釣石祈招度式金誰扶輦極正持慰杞人心

再次曹定菴憲副見寄之韻

九十未及八十餘惓惓憂國心如初臨池草聖水通墨
隱几心齋室自虛海內浪傳平子賦濟南誰授伏生書
煩公重有東山望懶性今從水竹居

丁丑季冬二十三日過永定邵氏舟次荆溪和

杜子美客夜韻時杜允勝陳宗讓同行

荆溪舟獨進兩岸雪山明風破孤帆力冰剗壞檣聲山
陰懷舊侶洛下詠諸生漸覺銅棺近悽然傷我情

夜泊方橋

天暝去程遠扁舟宿鴈沙
風烟漁浦樹汀水野人家
不識剡溪路空懷博望槎
鄰邦猶蹇澁況欲走天涯

河橋舟發歸途作

伐鼓侵星發吳門此日還
斷澌溪漲濶融雪隴痕斑
劍井來寒樹銅棺失暮山
衰年仍事役翻羨白鷗閒

宿毘陵驛

孤舟城下宿城漏滴寒更
往事無人問幽懷忽自驚
春

星垂野動村火隔江明北鴈無來耗蓬牕夢不成

黃勉之明水草堂

虎阜峭奔入天平秀特分軒牕通映水几席欲生雲讀
易已忘易攻文不倚文閉門方習靜非是故離羣

送李尹經述職之京

吳下徵輸歲轉多瘡痍方仗使君摩銓曹又上三年最
里下曾聞五袴歌茂苑雪消鳧舄遠彤庭日永豸冠裁
春風十里楓橋路挽鄧無由奈爾何

苔石幽篁圖

湖嵌一卷多瀟碧數竿足愛此亦何為正也受命獨

偶成

生世七十年迴看如一日中間事萬變或喜或憂戚得失與升沉其事固非一杳然如夢中無復留彷彿前者既已爾後來亦當必所貴寸心虛翛然不留物俯仰天地間無媿亦無慄

秉之六十初度

昔我與子兮弟南兄北看雲望月兮思其有極每懷一晤
語兮路遠而不得茲余乞告來歸兮子亦辭此郡章大
衾與長枕兮日夕聚此一堂胡為乎限一衣帶之水兮
欲濟而無梁一年不十會兮悵中心以皇皇喜獻歲之
發春兮將上元節鬧花燈高烧兮絃管噉噪嗟耳順之
華年兮亦人生之難到子春秋連連以日高余豈能乎
無眊眊世上之浮名兮曾不可以與謀彼器溢而餽覆
兮樂曾不免乎憂謀人國而不善兮寧顛蹶之憊尤進

陽阿之妙舞兮發南國之新謳歌舞洋洋而迭進兮曾
不知歲月之遒年年歲歲樂復樂兮與子同壽乎千秋
雙湖詩為僉憲謝廷柱作

差我靈峰嶺蒼茫寓國山兩湖分映東西間兩湖相去
無十里龜龍天池相對起朝游長林暮小泚蕩舟欲行
行且止君非渭川叟公侯封已晚又非鷗夷子烟波去
不返要知釣徒非釣徒勅賜散仙在江湖

偶成三首

飯飽亦何事繞池看魚行
凭闌秋雨歇倚杖暮山橫
忽吾將老紛紛物自營
百年天地內事業竟何成

睡起亦何事支筇獨看山
浮雲世事改白日此心閒
鼎歲華晚提提倦鳥還
雖居人世內人世了無關

黃閣三台輔青山一病翁
伊周曾有志房杜本無功
閱世人頻異謀生室屢空
行藏那可問雲外送飛鴻

題四皓圖

蒲輪應召出商顏
漢嗣瀕危即日安
若使四翁終羽翼

肯教雌雉變凰鸞

謝安圍碁圖

朝野皇皇意獨閒依然草樹八公山誰知秦晉興亡事
祇在先生一著閒

秉之惠巾製甚奇似東坡而小異老夫之所宜
戴也賦詩謝之

幘頭窄窄帽尖纖雅俗無如此樣兼墊似林宗微展角
高如蘇子不為簷將籠白髮真相稱若對青蛾未免嫌

我是越人猶愛著肯教漉酒似陶潛

四月八日飲陸長卿園亭

連峰忽地起巔岼倒影亭臺漾碧湍寶障傍人雲錦暖
玉甕留客蔗漿寒梅酸正入調羹用花好還宜秉燭看
魚鳥浮沉滿池上我來終日倚闌干

三月望日飲張延德園亭

高柳陰陰影入池落花飛絮蕩遊絲輕風送酒催雙漿
活火煎茶試一旗卻教詩書傳有種習家亭館醉無期

獨憐漆室何為者北望長吟有所思

延喆使歸自福建得衢州錦川石立於庭前戲

作

錦川東錦化為石道遠懸知不易來千歲僵松鱗駁落
一株寒玉骨崔嵬庭除有地煩相伴梁柱無能莫見猜
賴是前人清節在鎮船元藉鬱林材

玉林

藍田曾種玉歲久長琅玕琪樹東西映瓊枝遠近攢每

羞何氏獻聊試偃生食况復人如玉兼葭欲倚難

東湖書院為吳獻臣都憲賦

獻臣先家湖湘有東湖後徙廣西亦

作東湖書院
不忘先也

東湖烟水空復空乃在武昌之西嘉魚之東氣吞長江
捲七澤聞有至人昔年隱居漁釣於其中邇來一百四
十載九疑聯綿竟誰在豈知蒼梧萬里雲山中亦有東
湖儼相待潯江離江左右流落霞孤鶩長悠悠閒來竭
登大雲嶺霜露鬱鬱愁松楸主人自是身許國到此誰

能忘首丘此亦一東湖彼亦一東湖乾坤萬里雲飛孤
願君慷慨終許國致君堯舜始作范蠡扁舟圖

虎丘

誰云虎丘小我覺虎丘大嘗疑海上峰湧起自天外忽
墜平野中萬劫翠不壞夫差昔霸王猛氣亦已汰神斧
鑿巉巖洞勺銀河派雙崖削未平呀呬勢將嘖靈湫湛
寒碧劍氣溢光怪銀海鴈飛沉冰巖松倒挂前朝百戰
爭今為梵王界吳儂得游觀時節紛絳繚我老猶愛山

興至時獨邁聿登浮屠顛坐覺三吳隘雲夢如可吞八
九無蒂芥千人石上眠把酒向天酹不知開闢來曾見
幾興敗天風忽然生萬竅同一噫滿山松竹吟破浪恣
砰湃平生磊塊胸至此殊一快升沉世上名瑣屑真癡
疥我生本優游幸脫軒冕械甘為愚公愚不受蔡叔蔡
願言從樂天一年十二屆

送李端彝端行昆仲還嘉魚

二子故評事承芳之姪自楚至吳來

為其父
乞墓銘

二李高風挽不回
巫山衡嶽漫崔嵬
憑將一掬懷人淚
灑向黃公舊釣臺

自楚來吳幾千里
五湖風月得同遊
片帆明日人何處
悵望長江日夜流

烏林有鳥不安巢
聞有攬天赤壁高
我欲因之訪遺跡
側身南望首頻搔

武昌西去是嘉魚
縱有魚來不寄書
林屋天高無去鴈
他年何處問何如

野人獻菊碧色每叢作雙鳥並立名鴛鴦菊為
之賦詩

開與黃花不並時翛然天與碧鮮姿多應幼玉同韓重
化作人間連理枝

枝頭兩兩立東西知是鴛鴦不獨棲一種貞心誰得似
廬江小吏仲卿妻

不向東籬嘆落英相呼相喚本同聲不知草木緣何事
也作人間兒女情

再至天王寺有感

深鎖禪扉暫一開
竹間那復舊池臺
歲寒只有庭前柏
五十年前見我來

舊日沙彌今老禪
白頭我亦異當年
見恒河性依然在
莫為浮生一惘然

慰東岡失子

生子秀而文
燦然瓊樹枝
豈獨立門戶
且欲承裘箕
一朝忽摧折
天也真難期
縱使鐵石腸
誰能不哀斯
哀之

倘可生哀也理亦宜號天天不聞扣地地不知肝腸為
爾裂齒髮為爾衰死者竟不返生者空自隳兩傷復何
益不悟真成癡我有一藥方授之竺乾師能治迷罔疾
願君試服之茫茫大化中萬物皆寄而賢愚與貴賤趨
死同一岐雖有壽與夭同盡無等衰彭聃安在哉孔孟
亦若茲况區區所立畢竟何足施譬如空中華妄作喜
與悲倏然還變滅豈足仍追惟所以東門吳無兒如有
兒衆生纏愛賊有如雀黏羈卓哉古達人棄去如唾涕

愛河苟不乾苦海終無涯天道有翻覆人事多參差自古每如此吁嗟奈何其顏淵仁且夭不聞路也羸子夏泣喪明但為後人嗤追亡建負鼓嗟哉空爾為勸君急返棹收淚舉一卮

挽施仁德

東岡子

又是山陽聽笛時
元門第舊弓箕
鳳池乍長丹山羽
瑤圃俄摧玉樹枝
載酒常時過問字
趨庭此日罷聞詩
悠悠真宰如何意
誰與乘槎一問之

已卯開歲連雪有作

江南開歲逢三白
陰乍晴時晴復陰
瑞葉得風狂作勢
梅花和月冷難禁
漁蓑未愛江頭好
龍馭惟憂塞上深
我是袁安方閉戶
地爐火暖獨愁吟

是歲年
儉民飢

戲題羊皮燈

剗腸何罪有誰憐
化作光明照綺筵
百里粥從春市裏
五星明聚夜堂前
兔輪避滿哉生魄
魚枕潛輝宿解懸
只恐左慈工幻化
故來東壁弄清妍

己卯開歲九日弟鏐宅觀燈次秉之韻

燦燦紅蓮映綠池看燈又是去年時
銀毬雪色懸珠箔畫帶波文綰鐵絲
閃鑠最宜初月映颼颼無藉好風吹
因思二十年前會鳳閣傳宣趨進詞

詠魚枕燈

火樹千枝摠不如瑩然光彩透水壺
共言魚枕春裁玉忽訝龍涎夜吐珠
雲母屏開雲影動水晶簾展水紋鋪
香羅萬眼誇吳市瑣細空勞詠石湖

萬眼燈以碎羅紅白砌成工夫妙天

下見石湖集
詠吳下節物

朱半山輓詞

晚從秦晉結葭莩紹也他年可不孤回首玉山人去遠
夷亭斜日雨踈踈

幾迴折簡荷招要八月西風看弄潮今日稽山無賀老
畫船空指半山橋

次邵侍郎國賢見壽之韻

杖藜曉上清風閣北望雲山渺雲壑懷公不見誦公詩

清廟朱絃為誰作晨星落落今數公平生出處將無同
我生與世早多忤乞身歸卧湖山中俾來遠致兩罌水
風致年來那有此品題未擬桑苧翁煎法曾傳玉川子
力田自好任逢年隴雲寄我山中篇漢庭共詫大人賦
那知山澤非臞仙與公周旋亦云久不飲每酣公瑾酒
子牟魏闕本江湖公也那能忘黔首我心古井終不波
杞人之憂憂豈過緘詩遠寄惠山下問公究竟其如何
三月二十三日賞牡丹秉之不至有詩來次其

韻

老去那能復種花
姚黃魏紫亦誠嘉
豈知洛下平章宅
還到吳中楚老家
粉艷紛披晴墮雪
紅香繚繞晚生霞
揚州芍藥何如此
空色於人豈有涯

次林見素中丞見寄之韻

山林滋味老尤長
肯羨裴家碎錦坊
却羨雲莊千顆玉
炎風五月擘紅香

酒熟無人可共嘗
老年唯以醉為鄉
那能命駕輕千里

重作歐公會老堂

閏中秋觀月仍兩度生辰喜而有作

一年最好中秋月豈謂今年兩見之玉宇洗空如有待
冰輪出海本無期堯階影展新萱葉蟾窟光添古桂枝
舉酒向天還酌月年年初度得如斯

木石居士為葉文節賦

山頭一片石石畔幾株樹下有幽居人結廬與同住木
石不解語亦復何所知相看兩不厭終歲還自怡石吾

甚愛之千古無緇磷木有歲寒心冰霜見蒼潤二物豈
吾徒對之德堪進方今構明堂傍求柱礎材夫君久居
此乃獨胡為哉

閏八月中秋夕再至靈巖

靈巖高處尚堪梯佳節重來路不迷日落湖山天遠近
雲移臺殿月東西千年杜宇還悲蜀一舸鴟夷竟去齊
往事淒涼那可問懸崖荒蘚沒前題

重改靈巖玩月詩

浮雲捲盡碧天高坐見冰輪出海濤秋色十分當此夜
風光千古屬吾曹瑤樓不鑰身親到香徑無人首獨搔
天柱峰頭那似此莫嫌醉墨浣官袍

憫松有序

翠峯洞庭古剎也自寺門至官道皆雙松夾峙大
可數圍如葆蓋如虬龍每風動聲聞數里蓋宋元
故物也予甚愛焉每至輒坐其下移日今年夏至
則無復孑遺予甚愕焉召其僧尤之僧曰縣官征

徭急身之不存松於何有蓋粥之以充徭費也吾
聞釋氏為出世法謂世網不能加也徭且不免焉
非獨人之加而翦伐及於茲松千年故物且不能
逃於乎苛政之害如是哉是歲正德十五年也

洞庭古寺名翠峰山門夾道皆長松蒼皮鱗皴根詰屈
風動十里聞笙鏞團樂下蔭翠羽葆天矯上聳蒼髯龍
不知當年誰手植云是宋家三百年前之舊物每當赤
日坐其下時有清風吹髣髴因思古人不可見重是甘

棠無翦伐茲來忽見怪且驚倒卧道路縱復橫可憐堂
堂十八公盡與官家充踐更神咷鬼趲競遮護嵯摧壑
陷難支撐我傷嘉樹因久立封殖有懷何所及顛僵力
與風雷爭昏暗如聞龍象泣龍象泣何所為縣官催租
如火急伊昔秦皇法最苛猶有封爵來山阿如何今日
值劫數大斧長鋸交撈呵深山更深無處避豈若社櫟
長婆娑年來征稅摠類此誰采野老民風歌

七月三日大風

去年七月颶風作駕海驅山勢何惡沿江濱海萬人家
一半漂流餓蛟鱷今年七月仍颶風驅山駕海勢略同
人家有備幸多免禾偃木拔歲則凶我聞有道唐虞世
風不鳴條雨霑塊休徵五事來應時百穀用成民用乂
當今公道如天開金滕既啓羣公來賓賢養老子聖
風伯爾獨胡為哉

送顏檝檝同年水部澄之之子也

當年同看杏園花聚散升沉事可嗟之子此來知有意

年家情分是通家

前人遺墨尚縱橫
落落詩篇更老成
此去好施醫國手
官家藥籠要復苓

次石田松石圖

長松落落白石鑿
鑿根株聯蜷皮駁
犖懸厓倒挂蛟龍
僵干雲直上雷風
作仲圭死石田生
後先意匠同經營
想拈秃筆快一掃
勢與碣石爭崢嶸
堂堂十八公冰霜
閱雄俊巍巍石丈
人不緇亦不磷
兩翁抱奇節結交亦

相近我非米南宮每見思拜之我非陶隱居聽此心自
怡方今大厦連雲起柱礎明堂獨須此紛紛匠石正求
材胡為棄置深山裏胡為棄置深山裏

題任月山飲飼圖

韓生畫馬不畫骨月山七馬何崢嶸世俗紛紛方舉肥
誰收冀北空羣物連錢鑿蹄黃金羈圉人飲飼勤莫辭
一朝拂拭橫門道逐電追風君始知

米南宮苔溪春曉圖

春雲黯黯雨模糊
草樹熏微半有無
夢入苕溪天欲曉
不知元是米家圖


杜允勝偕陸子潛兄弟携酒至園亭

尋山何用過城西
屋後巉巖且共躋
高柳暖風初罷絮
曲闌疎雨不成泥
洛中雅自推三嘏
王所端寧止一齊
獨樂有園今共樂
不妨詩酒日相携

諸友飲怡老園分韻得春字

題詩昨日送殘春
桃李陰陰入夏新
風動漸驚紅落莫

雨餘猶愛碧嶙峋敢期事業同夔高且可壺觴引白申
獨有江湖憂未歇北來消息苦難真



震澤集卷七

欽定四庫全書

集部
震澤集卷八
十五

詳校官中書_臣瞿 照

中書_臣劉源濟覆勘

總校官進士_臣朱 鈐

校對官學正_臣常 循

謄錄監生_臣許 烺

欽定四庫全書

震澤集卷八

明 王鏊 撰

詩

至樂樓詩為大學士費公賦

橫林特地起高樓樓上書多擬鄴侯日與聖賢相對語
身於天地復何求三峰有意當牕見一水無聲繞檻流
試問主人何所樂本來無樂亦無憂

重賦弔文丞相祠

漢朝冠蓋盡臣元窮海累臣抱獨冤請劍便須遊下地
結纓何處是中原青泥不化萇弘血白浪空歸伍相魂
斜日悲風柴市裏行人千古掩啼痕

盧侍御師邵來謁予於山中時酷暑與約為山
寺之游未明舟乃潛發有詩來次其韻

炎蒸一室困塵編坐憶山房滴暗泉古寺晨游聊復爾
清溪夜發豈其然一天涼雨懷逋客半壁殘燈對老禪
清旦坐謠還至夕空餘隴月向人圓

次韻施東岡喜雨

酷暑今年直破秋，固應宋玉厭荷稠。
一朝雨勢翻天至，兩月炎威掠地收。
陋巷誰知顏氏樂，清時空抱杞人憂。
漳濱好在劉公幹，何日青山爛漫游。

費倫同七十少同硯席者也

少小相隨同隊魚，年來白髮映鄉閭。
追思往事都如夢，閒看浮生好是虛。
某水某丘游釣處，一觴一詠笑談餘。
與君再結丹丘伴，還見蟠桃結子初。

次韻沈方伯良臣為余七十之壽沈與余同生
庚午又同在郡膠今同致仕

黃髮歸來共理田食貧終不羨逢年泮宮燈火憐相並
李邵科名媿獨先紅藥花翻分陝路白鷗沙占太湖邊
年來南極當吳分莫怪鄉人擬二仙

贈葉巡按忠

鄱陽漏網觸奔鯨南國烽烟徹夜明江上貔貅雄遠戍
浙西士女賴長城鑄山久訝吳王濞斷鞵誰憐郭子橫

見說臺端峻風采草間狐兔不須驚

陸長卿為三山甚偉因賦

曾聞海上有三山飛墜君家苑園間乘興偶來觀縹緲
扶衰且欲上孱顏參差臺榭雲霞氣出沒巖巒虎豹斑
老我年來無長物舉杯相對亦忘還

延素藏李嵩畫因題其上

吾聞瀕彌之西興林國中有仙人未識頻伽獻果龍
象參有女跣趺常面壁終年面壁何所翫山月松風為

我伴湛然大定本來空要證菩提登彼岼當年生長本
王宮錦袍錯落真珠紅生身在慾不染欲濁水秀出青
芙蓉姻親眷屬棄如土瑠樓玉宇皆苓通一朝棄喧思
習靜白雀叢林去修性至人有念天不違孽火雖狂中
自定鎖邪干將段段壞身縱淪亡性常在豈知千古屍
多林天遣重生在人界從今不涉生死關六通四智正
覺還摩尼珠露靈光發優鉢花開本性圓九重藥王須
眼手眼手於吾復何有乃知忍辱有仙人手眼不嗔隨

所取兩手去千手生兩眼亡千眼現世人不識驚皆眩
千葉金蓮繞坐生億丈豪光放皆徧吁嗟流浪閻浮人
慾海曾無解脫因李嵩妙蹟傳千古稽首空悲蠅蝨臣

送王守會試

雙珠出南國光曜珊瑚枝一入天府選一嗟滄海遺連
城摠無價韞匱亦有時鴈行先後耳去去勿復疑

五色菊

嘉定童以遜用水
草接菊五色具有

前身那復是江籬白白紅紅忽滿枝恐是韓郎工幻化

賺教陶令醉東籬

年來黃菊也隨時闌出金盤與玉卮
姑射惶惶西子醉
歲寒心在許誰知

松石齋

蒼松落落偃虬龍
片石谿舂聳碧峰
石倚松根添瘦漏
松穿石罅轉丰穠
歲寒永結三生契
茅土曾加萬戶封
聖代祇今須柱石
大山長谷可能容

送賀志同少叅之官廣東

越王臺上柳毵毵使節行行五嶺南
多斧冰霜瞻舊史
薇垣風月待新參
檳榔萋萋葉還隨俗包匭菁茆好貢柑
自是隱之風節在石門泉水不名貪

瓦屋山歌

瓦屋山在雅州之榮經其地絕勝長洲
尹高君第聞之曰吾將老焉余悲其長往而不來也以吳人之意招之

瓦屋山瓦屋山乃在邛崃九折平羌間上有攬天壁立

之孤峰下有奔流赴壑之驚湍神光夜現普賢相紫氣
晝滿玄元闕娑羅花開錦繡斑蒙芽紫竹長琅玕誰云
風俗混髣髴世途險巇乃獨安武陵桃源在人間丹崖
萬丈誰能攀君今此去何當還長洲父老翹首日西望
願君少住慰我吳下之羈鰥

白巖歌為喬希大司馬賦

白巖在太原之平樂
南京兵部尚書喬公

希大家馬吳門周臣
寫其圖余為題其上

太行西來勢如翔兩崖忽斷紛開張中間沃衍散耕牧

至今風俗餘陶唐白巖嵯峨森立玉疑貯白雲千萬斛
又疑天山雪不消六月懸崖挂飛瀑長松砢礪偃虬龍
磐石坐送孤飛鴻朝看白巖橫暮看白巖縱幅巾芒屨
長松下白巖處處長相逢一朝還為蒼生起坐鎮留都
惟隱几江東烟樹晚重重回首白巖雲萬里苻堅入寇
不須驚隱然人倚如長城圍棋似是謝安石斷割誰為
郭子橫只將忠赤佐天子不管白壁來青蠅青蠅
何為哉我思白巖歸去來

和林見素次蘇子卿見寄之韻四首

向晚心不怡中庭立徘徊羣雅競鳴噪孤鴻獨無依無
依亦何恨稟氣與時乖物情逐時好志士多苦懷咄哉
賈太傅厝薪胡獨悲黃竹有遺歌至今令人哀籠鳥望
雲端自傷翅翎摧海濱有大老何時當來歸知音苟不
存五絃徒自揮悵望武夷雲我身安得飛

夜光忽暗投按劍知無因傾蓋苟如舊異世為同人昔
君向遠謫可贖人百身紛紛燕蝠輩相爭錯晨昏對面

不相見肥瘠越與秦所願崇明德皓首期日新物理有
相感波間躍麤賓嗟嗟皇甫規豈是中州人誰云閩吳
遠眄昧心所親

驅車遠行邁中道忽自疑章甫資之越無乃非所宜涼
颺撼庭柯締綌已淒其歸來洞庭野茹糗勿復辭椒蘭
亦已變稂莠能無滋四時紛代謝彼此各一時獨卧茅
檐下無為浪多思

昔我游藝苑吸露漱奇芳及今志乃吞敢望作者堂一

編誰所授來自閩之鄉讀之增壯氣字挾風與霜忽然
造冲澹蘇李同翱翔借問何能爾上池飲竒方鳬鶴各
有分誰復計短長蒹葭望伊人宛見水中央秘之在篋
笥時時吐晶光

聞尚書泉山林公訃

俯仰天地間我生殊已晚古人不及見前輩亦漸遠昔
年忝朝列三五齊手板入叅議帷幄出翱翔藝苑兩心
無猜疑終始共推輓豈知一朝異分散東西征羣才飛

刺天林立盈彤庭三五各天涯相映如晨星嘆惜時所
背空負海內名有如林泉公宿德衆尤向詞林三十年
鎮密見涵養操履冰玉清文章臺閣樣榮名勢利途衆
競獨退讓臯比坐成均六館無孟浪道傍推大宅寒士
俱挾纊保釐向南都百僚同倚仗平生事藏密臨事何
慨忼大奸弄朝權士氣紛沮喪羣蟻赴腥膻正色疏獨
抗浩然賦歸來高卧青山雲弘開綠野堂賓客引白申
廣德車尚懸疏傳金不貧行年八十餘龍馬富精神人

言天所留復起承華勛方期會老堂杯酒道情素訃音
忽然聞風前淚如注安得延陵劍挂向閩山樹

懷恃卷為歸仁賦

人皆有母而我獨無嗟我之生曾不如彼慈烏慈烏有
母能反哺我養不逮獨飲泣以躊躇人皆有子而母獨
亡嗟母之生曾不如彼空桑空桑有子能返顧母年不
待獨飲泣以彷徨

荆山小景為王維綱兵侍賦

小築雲巖寄此身
軒牕長對碧嶙峋
龜蒙鳬嶧連天起
祇與荆山作主人

觀福建內臣進花鳥賦

玄猿呈藝宛如人
孔雀鵷雛貌摠真
怪石鉛松曾入貢
名花異卉摠橫陳
藩方故事修應舊
聖主當陽德正新
一路光榮人莫羨
已聞千里罷還民

贈黃道士

海上仙槎去莫親
青谿騎鶴更何人
叅同契得心傳妙

太乙爐存火候真白日山中號鬼魅黑雲壇上撥星辰
年來黃髮衰遲甚乞與明牕一縷塵

送高德元還越

解纜錢塘過五湖童蒙求為指迷途方池墨暈春波淨
別館書聲夜月孤十載交情如一日九師精義重三餘
願君莫作飄然計正講濂溪太極圖

寄韓尚書貫道

河東夫子近何如北鴈聯翩不得書一片丹心終許國

半生華髮只鰥居尋盟莫放山陰棹挾策誰從白下驢
我有愁懷何處寫首陽雲盡月痕孤

奉和東岡歲暮有懷見寄之韻

歲暮相望思渺然幾迴欲去更遲延舟辭震澤無多日
厯改王春又一年澗壑未須悲濩落閣門誰正侯傳宣
人生得喪應難定社櫟無能却自全

次韻文徵明見贈之作

十年穩卧碧山阿姓字無緣落諫坡江上野鳬元自佚

日邊威鳳沉云多正逢聖理方更化豈謂溫綸亦漫波
幾度懷恩思自効蹇疲難進欲如何

和謝少傅晚步見寄之韻

疲繭懸知進步難十年學道得鯢桓晉家謀國三為衆
蒙叟巢林一已安獨上高丘時縱眺偶携稚子亦成懽
願公早為蒼生起林下還霑聖澤寬

憶秉之

歲歲重陽送異葩楊妃西子鬪橫斜今朝獨到東籬下

含淚無言對菊花

歲歲元宵興倍增
羊皮魚枕各分明
繚絲新出滇南樣
獨惜伊人見未曾

歲歲春山得共游
藍輿軋軋兩夷猶
如今不用登臨去
花落花開獨自愁

常時見月倍相思
海北天南會有期
今日舉杯還向月
不知何日是歸時

月下花前每舉觴
分題押韻兩相當
如今風物依然好

不見來書細作行

敗葦蕭蕭古岼頭垂楊兩岼送行舟夕陽衰草荒郊外
爭使行人不淚流

每到塘橋月色昏兩燈扶幼自應門如今怕向西州路
舟過楊林淚暗吞

久旱喜雨

五月炎燄熾若焚西來一夜雨翻盆欲知遠近懽多少
白滿陂塘綠滿村

唐子畏臨李成羣峰霽雪圖

吾聞西域之西雪山高六月積雪猶不消今之畫圖無
乃是是何山勢洶湧如波濤大山崔嵬小山聳萬壑千
巖光欲動營丘化去五百年遺踪一見人皆竦六如胸
次蟠輪囷戲梭碎玉散作千嶙峋一重一掩分向背營
丘似是君前身隆樓傑閣爭相向美人正醉銷金帳豈
知洛陽城中僵卧者門外無人雪一丈

毛都憲七十邵二泉以前韻為寄復次之

紛紛才俊登臺閣誰伴幽人住巖壑龍驤萬斛橫巨川
商家欲濟須渠作當今人物有如公胸蟠經濟誰能同
世人重腊不重玉居然棄置中吳中臣門如市心如水
崇也當年亦如此平生意氣小楊修碌碌誰能數餘子
力田終不羨逢年熟讀叅同內外篇七十年來髯似漆
人言真是地行仙錢彭八百不為久壺中自製長生酒
金華玉液分劑停鶴髮飲之成黑首世途宦海足風波
鍾呂日久相經過黃芽白雪行已熟日月跳丸奈爾何

嘉靖元年二月廿九日與林司空見素同登上
方俯視雲水千頃青黃絢爛見素曰此一片
錦也賦詩紀之

晚扶殘醉上岵嶢雲水空明映碧寥雨歇花畦紅冉冉
春歸夢隴綠迢迢幾番游鹿還堪弔一去冥鴻不受招
遠客登臨思無限手摩蒼蘚認前朝

送毛百朋之北京應舉

幾年白下避車塵此去爭誇脫穎新桂子已傳蟾府種

杏花還醉曲江春題名早覺光生里捧檄懸知喜為親
八月南來鴻雁便音書寄我莫嫌頻

送大行人柯君使畢還閩中省覲余竊伏草野
無復當世之望忽承九重遣使銜命下賁丘
園此三代養老引年之盛禮也斯禮也不見
於天下久矣顧余何人而際其盛君使既竣
便道歸拜太夫人于堂感激之餘無以為報
因賦詩贈之

天王出震萬方新草莽還能念老臣
誥錫紫泥銜鳳嘴服裁文綺損蛟鱗
未嫌五馬歸朝趣且喜雙魚入饌頻
衰病自憐無補報寸忠還仗達楓宸

林見素自吳過二泉二泉有作次其韻

旛旐翩翩動復延幾迴翹首太湖天
一生面會知何日千里神交積有年
載酒未過揚子宅抱衾同上鄂君船
知音自昔稱難遇第二泉頭撥五絃

千尋礪硯慧巖松歷盡冰霜有好容
二叟共談泉上石

孤帆三宿海邊峰
淵然叔度難為挹
老矣馮唐豈願逢
盛世臯夔方並入
巢由自可遂疎慵

傷庭梧

嘉靖改元七月廿五日颶風大作庭前雙梧其一
忽顛賦詩傷之

庭前兩梧桐膚寸手所掇歲月曾幾何
直上殊挺拔我
我雙幡幢雲漢相摩戛
謂言召南棠百歲辭
剪伐獨嫌
清秋夜障我中天
月星辰互蔽虧
胸次不得豁
意欲稍

去之惜此方憂鬱颶風忽西來勢倒滄海竭屋瓦盡飛揚行道多顛蹶挺然與風爭倔強蛟龍跋終然不自持劃若崩山坼杜陵惜楠樹我意亦恍惚信哉昌黎言木高風必折勿言勢崔嵬螻蟻中潛穴似聞崇明沙濱江馬陀窟萬室隨江流老少多漂沒公胡久彷徨為此良咄咄翻惜堂構初不種松與栢

金氏亭上賞菊昔曾於此看牡丹

牡丹亭上昔同看又見黃花感歲闌西子韶華常帶醉

東籬晚節頗禁寒坡翁莫恨居無竹楚客空嘲澧有蘭
秋月春風興無限為君終日倚闌干

癸未春予送女至京口至之明日為上元節是夜

宴邃菴楊少傅第少傅懸燈于山燦爛奇甚

良辰勝事古難齊此夕鰲峰喜共躋遠岫流輝星上下
曲池倒影月東西臨風玉樹遙歆雪出水青蓮不染泥
鐵甕城高如白日歸途馬上聽晨雞

遊招隱等寺

春寒漠漠上宮袍
雨後山光湧翠濤
洞口雲埋龍尚蟄
壠頭泉迸虎曾跑
每因懷古還興歎
豈謂尋幽反得勞
明發丹陽重回首
長江天遠甕城高

茅山

大峰小峰連中峰
當天削出青芙蓉
一朝忽立九霄迴
百丈已度千巖重
思昔鼇輪同駕鶴
祇今雲氣猶成龍
遙遙長史復何在
華陽洞裏應相逢

茅山巧石亭

太湖有奇峰倚插半天裏風雷忽失之何年飛墮此

孟子河孫氏樓

江上青山山上樓凭闌俯瞰大江流海門烟樹熹微見
云是三山與十洲

張旭春草帖子聞其奇久矣今年至京口始得
觀于少傅楊公之第天下奇蹟也公欲予題
其後以詩來云敝墨殘毫一尺餘老來猶得
伴幽居宋元好事題將徧當代名公可缺書

余謝不敢當次其詩云

種髮蕭蕭七十餘問竒還過子雲居幾迴欲繼元和脚
阿買從來不解書

禽言

吳中蠶熟時有鳥日夜鳴其聲云摘芭看火相傳
昔有婦摘芭棲蠶火發芭上焚死化為鳥余憫其
志為賦二首

摘芭看火摘芭看火星星早不滅炎炎熾其那吳宮已

成灰阿房亦焦土摘芭看火

摘芭看火摘芭看火汝身不自全更管人間火李斯佐
秦亡林甫熾唐禍摘芭看火

次木齋閣老見寄之韻

行年七十又加三俯仰乾坤幸免慚世有錢鏗方我老
坐無鮑叔共誰談夕陽溪壑翠尤倩曉雨園林綠正覃
還擬西湖為勝集已拚沽酒典朝衫

纔說迎春又送春紛紛紅紫幾番新誰云海內無知己

且喜尊中有聖人瘦似維摩還示病樂如原憲不妨貧
山人自合山中老出處無煩問大鈞

知樂亭

深巷逶迤接遠汀小園花竹閉幽亭春池水漫魚遊樂
午院風微鶴夢醒有榻可能分我坐無絃元不要人聽
日長讀罷叅同契正對前山一點青

六月苦熱壬子日得雨喜甚

幢幢淅淅又蕭蕭兩月炎威一夕消酷似甌山揚火幟

快如銀漢瀉天瓢
垂龍久鬱蒼生望
淑氣潛回赤土焦
林下老人忘帝力
有年還聽路傍謠

送盛斯徵都憲巡撫江西

鴻都兵後望來蘇
江左來旬此大夫
入夜災星方退舍
訖朝甘雨又隨車
風較舊仰塞帷外
河潤新傳視篆初
文肅家聲真不負
尚能把筆為君書

題畫

杏花如雪滿長安
起視星河夜未闌
為惜穠華宛相似

臨風先折一枝看

坐看冰輪碾玉池夜深欲去更遲遲
廣寒宮裏誰為伴特為姮娥住少時

和東岡憎蠅

炎宵擾擾困蚤蚤稍喜新涼奈爾蠅
每向杯槃傷沒溺故於眉睫惱瞢騰
居然能變白為黑忽地翻令愛作憎
勸爾營營休自得西風昨夜報嚴凝

謝郭長洲惠橘

琬琰紅玉寫纍纍四月江南見亦稀只訝蠶房輸與蜜
誰將猩血染為衣釘來客座驚三絕種向家園待十圍
他日洞庭修橘譜便應書作郭公緋

朱橘

誰從天竺到閩南移得祇園別樣柑灌頂醍醐雖少液
兜羅綿色尚餘甘一拳不減商顏趣十指分明佛手纖
歌利不須矜節解最無嗔恨是瞿曇

佛手柑

丹陽孫思和訪余于洞庭詩以送之

曾訪南徐孟子灣七峰高處恣躋攀何當再約孫明復

徧覽長江兩岸山

玉柱金庭未易尋
飽看七十二瑤岑
太湖多少閒風月
歸對金焦盡日吟

重陽前二日東岡人來約登高之處詩以報之
風風雨雨重陽近
肯向東籬漫舉杯
闕下每叨黃紙問
林間還喜白衣來
五湖烟月容兼管
百歲風光許獨陪
老眼欲舒何處好
與君携酒上崔嵬

東岡有只愁風雨似今朝之句走筆次韻答之

太湖高處望夫椒佳節登臨不憚遙折簡故人先有約
定知風雨不崇朝

九日登象鼻諸嶺

秋來日日風和雨猶喜重陽一日晴携酒登高高興發
徧摩石壁與題名

重陽後復雨速東岡

蕭蕭風雨送重陽索寞園林夜有霜咫尺故人期不至
黃花端復為誰香

和見素尚書得謝之韻二首

把袂楓橋憶去年
旋聞廷論幾扶顛
尚方甫聽尚書履
春水忙歸野渡船
冠蓋便應傾洛社
經筵不道少伊川
從今烏石岡頭歟
付與希夷自在眠

雲補衣裳竹補亭
亭中高卧一人醒
匣涵溫室金泥紫
飯煮仙家玉粃青
自信逆鱗無忌諱
亦緣磨蝎有神靈
何當萬仞浯溪石
魯國顏公與刻銘

重陽後五日延陵奉菊為壽五色皆具而紫菊

特奇因賦

舊種寒花五色齊年來紫菊出關西楊妃醉醒暈猶在
順聖名高價盡低點綴不煩丹竈永封培應藉武都泥
姚黃魏紫元相媲美說與詩家漫品題

金碧山水為丹陽孫思和賦

碧水丹山碎錦茸樓臺疊疊樹重重恍然坐我江南岸
相對君家七秀峰

胡太守孝思奉詔存問過太湖有作次其韻

東南巨浸茫無外吳越交爭向此中
漠漠鴈飛愁欲墮
冥冥帆遠若乘空樓臺倒影星河動
花木交陰島嶼通
倘沐皇恩分一曲他年請爵太湖公

林屋峰前受一廬渚鳬汀鷺住相連
久塵殿閣三台地
歸占東南一洞天詔下屢沾新雨露
林間還與舊雲烟
自從白傅來游後直到君侯兩似仙

毛給事王高祖母劉曾祖母魏雙節詩

姑孀居婦孀居姑誓不負夫婦誓不負姑
艱危顛踣交

相扶兩心炯炯冰玉如寒燈照影相映孤牀頭遺息聲
呱呱煦濡抱負夜辟鱸迄今有立非所圖山南崔家大
且都天道耿耿良不誣天道耿耿良不誣

胡太守再次前韻復荅之

太湖三萬六千頃七十二峰烟雨中萬壑奔流秋野濶
孤松倒挂寒潭空恍疑靈境與凡隔豈謂人寰有路通
畫船五宿澄波裏千古風流始屬公

洞庭東西雙玉峙物外地脉相勾連雨後人耕隴上陌

月明犬吠洞中天紅蒸遠岫上朝日暝入孤村生暮烟
漁郎再到忽迷路錯比桃源道是仙

歲暮有懷木齋閣老因寄

東山謝傳近何如尚憶同游玉署初歲月閱人雙短髻
功名過眼一蘧廬剡舟有興空回棹塞鴈無緣得寄書
聞道西湖好風日幾迴命駕復躊躇

胡太守冬季存問謝之

退傳閒居正穩眠忽聞優詔下林泉玄纁束帛皇恩重

駟馬旌旄太守虔三代引年聞有禮間身報國媿無緣
獨憐葵藿心猶在願得迴光徧海堦

復生

萬生擾擾咸歸盡盡處還延世盡驚揮環且非羊叔子
折矢乃若徐佐卿庭畔枯株有由斨雲間晦月哉生明
相知相見莫相訝昔時子政今更生

盧師召侍御新建范文穆祠於石湖傍有詩次
其韻

萬木陰森蔭畫梁
淳熙奎畫尚流光
一丘占盡吳山勝
二水分縈越壘長
枯坐老禪依竹影
時來估客薦蘋香
雪坡天境依稀在
莫把名園比洛陽

重遊一雲寺

一雲在天平之西
余弘治間曾一至
焉留詩而去
正德辛巳復至其地
俯仰二十餘年矣
感歎之餘
漫賦一絕

為愛禪房好竹林
不辭迢遞度遙岑
山僧認得曾來客

祇是鬢髻雪滿簪

游穹窿山

與鐵柯輩泛舟至胥口潘氏日已西遂宿明日雨
將午少霽至穹窿寺寺在山腰飲法雨亭而還不
能窮絕頂之勝也

十年林下無羈絆吳水吳山飽探翫穹窿至近高且險
欲至靡由輒興歎喜聞地主有嘉招春服初成雜童冠
畫船載酒出胥口略綽湖稍旋抵岼民淳地僻客至稀

老少相扶出門看吳王種香涇尚存歲歲采香多女伴
我聞且欲登香山雨脚忽來行渙散明朝雨勢止復作
世路陰晴那可筭文侯豈失虞人期勇往前行賴明斷
藍輿旋寧那復辭邈迤青山開四畔前山雲接後山雲
似是山靈顯奇觀欽崎嶇确路登登山腹盤迴轉危棧
諸峰一望皆下風始信陽山纔抵半買臣駁落讀書臺
曾是樵夫終佐漢丈夫出處會有時不記當年愚婦訕
清泉一脉甘且寒肝肺塵埃得湔浣山頭咫尺不得升

甘被同行譏老悞茲行雖勝興未厭斜日歸途幾留盼
回頭一笑謝地主他日重來殊未晏

和邵二泉申詔許終養韻

青門幸有種瓜田出處無煩更問天自是皇恩深眷戀
非關臣賦有奇偏情同令伯陳情表志在高平樂志篇
願得王陽長在位且教貢禹過年年

月夜與客飲千人石

千人石上來多矣豈知月夜尤奇偉纖塵不動萬籟寂

冷然一片瀟湘水平鋪寶簾光瑩滑腳踏白雲飛不起
又如藍田種玉生未齊璆琳琅玕高復低樓臺林影互
虧蔽恍如龍象如狻猊衆賓興起歌且舞持杯互勸行
相携歌聲上過行雲斷舞袖翩跹影凌亂僧房有客竊
睨之疑是羣仙降霄漢生公說法今安在巨石低頭向
人拜一方明月還可庭空色元來本無壞舉杯問月月
不言劍池龍化石依然吳王已去那復管付與吾人一
醉眠

余斷送迎久矣內翰嚴維中奉使三湘還過吳
治具邀余過虎丘余不能辭也賦詩一笑

看徧蒼梧山外山吳中仍愛小孱顏如何地主翻為客
多少榮途未得閒張席坐隈新竹粉題詩剗破古苔斑
夕陽共下山門去處處停橈未擬還

邵二泉點易亭右得泉有詩次其韻

酷憐螭吻瀉寒泉百里曾煩乞剗涓繞舍雙魚驚岼躍
調符單馬罷郵傳不愁海若卑秋水會見宣尼嘆逝川

大易無言原有象定應天一在亭前

錢汝礪院使八十

當年醫國更何人閭闔傳宣入對頻何事帝心多簡在
家傳佐使與君臣

辛巳新春有感

山林朝市本無干怪事驚心欲遣難金谷多藏還作祟
鹿門計拙却為安始知晏子辭卽殿豈是王晞愛冷官
天與百年雙老眼可堪看徧世途艱

十三絕句

白草茫茫走亂沙
邊風獵獵動悲笳
燕山臺殿雖然好
宣府元來是我家

少年天子重邊功
烏帽戎衣手角弓
行徧漁陽并上谷
並無曠騎到雲中

安化跳梁即日平
中原羣盜敢縱橫
鴻都造亂誰堪使
除是君王自領兵

彭蠡風颿一箭收
九江安慶是安流
說與藩王徐送款

親臣無數要封侯

天子臨江渡六軍長江無浪天無雲笑殺當年魏文帝
武夫空復有千羣

縛得名王氣轉雄凱歌聲裏擁元戎發蹤不用蕭丞相
合與官家第一功

燕雲漠漠鎖重樓八駿驅馳正未休莫道十旬猶不返
金陵原是帝王州

二水三山入豫游八方無事更何憂秦淮流水悠悠在

好與官家造酒樓

相國移家江水湄
金山望幸已多時
太平金鏡無由進
願得迴鑾一顧之

三顧頻繁亦未閒
金陵東下是金山
分明鐵甕頭邊路
載得賢人與共還

趙普元為社稷臣
君臣魚水更何人
難虛雪夜相逢意
海錯猶堪佐酒巡

北固山前駐翠華
殷勤來訪相臣家
太湖怪石慙多偉

也得相隨載後車

賡歌千載盛明良宸翰如今更煒煌漫行魚龍看未了
梨園新部出西廂

題西湖春景

吳山下瞰西湖水山外青山相對起前朝遺跡何處尋
高下亭臺花霧裏又聞西域靈鷲峰飛墮西湖東岼東
穿花映柳隱復見游人如在錦綉之叢中上天竺下天
竺三十六峰如立玉錢塘潮湧雪山來海門巨浪高如

屋我生山水夙所好咫尺錢塘未曾到未曾到神先游
畫裏見山如舊識前身已似到杭州何當一日命小舟
載我西湖湖上頭徧覽東風十二樓

寄韓司徒

我昔游京華賢豪並馳騁所睇稷契輩肯顧絳灌等一
朝事勢異雲散江湖迥翛然卧一丘百念付灰冷死生
離合間我志久已冥有如河東公在念獨耿耿公如玄
酒樽澹泊中雋永世途亦堪憐汲短廢脩綆憶忝剡薦

初對判尚書省我言公弗猜公意我先領公如劍就硯
我若弓受檄退食多賡酬官居無造請雜篇東碎金欲
和輒羞郢豈徒滅坎窞固已絕畦町深情獨先飫苦節
衆尤警從宦四十年一室每懸罄中年已鰥居不惑先
楊秉曾無管蒯從況乃粉黛靚吏人抱衾裯一燈照孤
影朝釘具三韭夕設或脯脰魯山與陽城異世可同境
啜醕彼何人衆醉嘲獨醒謙謙君子心當事尤骨鯁率
衆叩天閭羣邪期盡屏傍觀何脉脉獨立殊挺挺嗟天

獨奚為事變在俄頃逆閹據津要威福恣所逞平生相
許志一旦成畫餅亟褫乃所甘酷罰獨何肯我時忝樞
近太息莫能拯俸資或潛輸譬割春鉏脛歸卧汾晉間
甘心混鼃黽卻掃絕梁碭清風播箕頽公既遯蒿萊我
旋謝台鼎吳晉兩閒人萬里星河炯茫茫天地間挂此
東西景蛩蛩失蛭墟佇望勞我頸靡由探興居况復承
欵聲欲命淮南駕或放山陰艇出門若有礙大道坐成
梗何時睹至治四國仰嘉靖二鳥復相逢雲天恣游泳

王成憲府博自崑山來為予七十壽成憲時年
七十八矣追數京師詩社中人惟予兩人在
者感劉禹錫詩因成四首

當年闕下會羣才日日賡歌把酒杯
四十年間誰復在白頭相對有鄒枚

鄴下陳思久已亡應劉徐阮摠堪傷
誰知獨有安陽客還到吳門舉一觴

成憲安陽
都尉門客

題詩倚醉字橫斜不忍重看感歲華
白髮年來心尚在

手持紈扇索驚蛇

欲唱涼州調未真
米嘉榮後更何人
只今才俊休相笑
曾是文莊席上珍

偶成

一日日已去
一年年復來
來者如黃河之源滔滔而不竭
去者如長江之水滾滾而不回
人生百年復何有
來者去者推相仍
麒麟閣上幾時畫
蓬萊頂上何時登
我聞九州之外有九州
又聞天上五城十二樓
安得挾彼

安期羨門鍾呂輩乘風馭氣同遨遊
下視人世如浮漚
志喜和秉之韻

周邦雖舊命維新
歷盡冰霜快值春
天上真人方出震
海濱大老定來臣
奸回已報都從殛
風俗何憂未盡淳
但使遺才收拾盡
不妨垂老太湖濱

天書夜下罷游田
斗覺薰風入舜絃
郢邸一朝潛忽現
蒼生四海負皆蠲
大橫已協重離兆
厄運行辭百六年
從此寰區無一事
朝廷尤望任惟賢

故順庵駱先生挽詞

泮水從游處重來尚宛然古臺猶有柏壞沼已無蓮講
授春風地絃歌夜雨天四方多弟子深媿表新阡

石田學蒙泉閣老畫蒲萄

虬髯詰屈幹鱗皴二老含毫闢出新試看山亭秋雨裏
不知若箇得渠真

虎丘陸羽泉埋沒荒翳久矣高君尹長洲始命
疏濬且作亭其上以表之予賀茲泉之遭也

賦詩紀之

翠壑無聲湧碧鮮
品題誰許惠山先
沈埋斷礎頽垣裏
搜剔松根石罅邊
雪乳一杯分沆瀣
天光千丈落虛圓
向來棄置行多惻
好謝東山悟道泉

洞庭有悟道泉
甘寒清冽而不與桑

亭翁
之品

震澤集卷八